

四庫全書

子部

欽定四庫全書

子部
莊子口義卷三

詳校官監察御史_臣邱庭澍

檢討_臣何思鈞覆勘

總校官原任中允_臣王燕緒

校對官監丞_臣張曾炳

謄錄舉人_臣史殿榮

欽定四庫全書

莊子口義卷三

宋 林希逸 撰

內篇大宗師第六

大宗師者道也猶言聖法天天法道道法自然也
知天之所為知人之所為者至矣知天之所為者天而
生也知人之所為者以其知之所知以養其知之所不
知終其天年而不中道夭者是知之盛也雖然有患夫

知有所待而後當其所待者特未定也庸詎知吾所謂天之非人乎所謂人之非天乎且有真人而後有真知人之生也凡事皆出於天故曰天所為然身處世間人事有當盡者故曰人所為人事盡而天理見是以其知之所知以養其知之所不知也不役役以傷生故曰終其天年既知天又知人故曰知之盛也此數語甚正雖然有患而下此一轉尤妙知有所待而後當知在我所待者在外或無所求而自得或必有求

而後得皆不可得而定當者定也亦當否之當也事既定而後見其當與不當此一字下得最工若以為出於天又必求而後得若以為出於人又有求而不得者此所謂詎知天之非人人之非天也譬如壽夭不貳莫非命也而又曰知命者不立乎巖牆之下便見天所為與人所為不定處莊子看世事最精此等處當子細玩味必有真人而後有真知此言有道者也

何謂真人古之真人不逆寡不雄成不譽士若然者過而弗悔當而不自得也若然者登高不慄入水不濡火不熱是知之能登假於道也若此

寡不足也不逆順也當不足之時即聽順之功雖成亦不以為誇雄誇也士與事同古字通用如東山詩曰勿士行枚也謦謀也無心而為之故曰不謦事過而弗悔過失也猶今曰蹉過也當而不自得當諦當也猶今曰恰好也事成也自得自多也凡事或失或

成皆委之自然不以失為悔不以成為喜也登高不慄入水不濡入火不熱即無入而不自得也知之能登假於道言其所見深造於道也兩若然者此是莊子筆勢知與智同假至也

古之真人其寢不夢其覺無憂其食不甘其息深深真人之息以踵衆人之息以喉屈服者其嗑言若哇其嗜欲深者其天機淺

其寢不夢神定也所謂至人無夢是也其覺無憂者

與接為構而不以心闔也其食不甘即無求飽之意
禪家所為塞飢瘡是也其息深深真人以踵衆人以
喉道書修養之論其原在此神定則其出入之息深
深皆自踵而上至於口鼻所以有數息之法神無所
養則其出入之息止於喉間而已靜躁不同體於身
者見之哇吐也嗑咽也內無真見言語只在口頭所
以易屈服於人此一句看叅禪問話者方見得莊子
之言有味如所謂蝦蟆禪只跳得一跳便是若哇之

易屈服也嗜慾者人欲也天機者天理也曰深淺者
即前輩所謂天理人欲隨分數消長也此一段一句
是一條貫道書佛書皆原於此足見此老自得處不
可草草讀過惜不見大慧張平叔與之論此

古之真人不知悅生不知惡死其出不訢其入不距翛
然而往翛然而來而已矣不忘其所始不求其所終受
而喜之忘而復之是之謂不以心捐道不以人助天是
之謂真人

此一段只說生死出生也入死也儻然而往儻然而來不忘所始不求所終受而喜忘而復即是生死兩字不距者不逆也儻然隨之之意也不忘所始不求所終即所謂原始要終故知死生之說也或問趙州曰和尚百歲後向那裏去州云火燒過後成一株茅葦是不求其所終也受受其形也得之於天安得不喜復歸也全而歸之無所係念故曰忘而復之不以心捐道即心是道心外無道也不以人助天壽夭有

命人力無所加也此十字當子細讀之不捐者不
斯須離之意

若然者其心志其容寂其顙顙淒然似秋暖然似春喜
怒通四時與物有宜而莫知其極

志者有所主而定之意此書字義不可以語孟之法
求之前輩云佛氏說性止說得心既曰異端矣又安
得以吾書字義求之寂靜也面壁十九年是其容寂
處顙大也顙顙也頭容直故見其顙顙然淒然怒也

暖然喜也無心而喜怒猶四時之春秋也極止處也物事物也隨事而處各得其宜而無一定所止之地即所謂以接而生時乎其心者也

故聖人之用兵也亡國而不失人心利澤施乎萬世不為愛人

用兵毒天下也施澤愛天下也皆以無心行之則亡國者亦不怨被其德者亦曰帝力於我何有吾書亦有此意但莊子之筆形容處說得多過當如曰澤及

萬世而不為仁豎萬物而不為義皆是此類

故樂通物非聖人也有親非仁也天時非賢也利害不通非君子也行名失已非士也亡身不真非役人也若狐不偕務光伯夷叔齊箕子胥餘紀他申徒狄是役人之役適人之適而不自適其適者也

此數句乃是譏謂聖賢以形容真人之不可及其意蓋謂世無真人不知至道自聖人而下無大無小皆非也樂通物者聖人之心以無一物不得其所為樂

也通得所也不任物之窮通而以此為樂不足為聖人矣無心則無親疎有疎有親有心矣有心則非仁矣順時而動知天時者也賢者以此為能亦非也就利違害君子能之未能通利害而為一則君子亦非矣士必為名名者實之賓為賓失已也故曰非士真自然也不知自然而勞苦以喪其身是役於人者非役人者也此皆過當之論故孤不偕而下如伯夷叔齊箕子皆遭譏訕以為役於人而失其已者故曰不

自適其適其語雖偏其文亦妙狐不偕務光胥餘紀
他申徒狄皆古之賢者不自適不自得也

古之真人其狀義而不朋若不足而不承與乎其觚而
不堅也張乎其虛而不華也邴邴乎其似喜乎崔乎其
不得已乎濔乎進我色也與乎止我德也厲乎其似世
乎警乎其未可制也連乎其似好閉也悅乎忘其言也
以刑為體以禮為翼以知為時以德為循以刑為體者
綽乎其殺也以禮為翼者所以行於世也以知為時者

不得已於事也以德為循者言其與有足者至於丘也
而人真以為勤行者也

此一段形容之語儘有溫粹處但說得太頽洞佛書
中多有此類狀容也義而不朋中立而不倚也慊然
若不足而不自卑承者奉承而自卑之意左傳使之
副者曰承與乎容與也觚德之隅也觚而不堅有德
之隅而無圭角也張乎舒暢之貌也虛者有若無也
不華者實也邴邴喜貌似喜而不喜崔下也處世應

物有不得已之意亦猶悶然而後應也瀦聚也充悅之貌其生色也晬然見於面故曰進我色止我德者即所謂虛室吉祥止止也與乎自得之貌厲嚴毅之意望之厲然亦與世人同也而其中實有崔乎不得已之意故曰似世警乎大之意也無所屈於世故曰未可制好閉不欲開口也連合也密也方其未言似不欲言及其既言亦若不言故曰悅乎其忘言也兩句即一意悅乎俯下之貌體本也翼附也聖人則曰

明於五刑以弼五教此則曰以刑為本而禮為附皆
是反說綽乎其殺者雖殺之而綽綽乎毋忤於我心
也行於世以禮徇俗也時乎用知則用知是不得已
而應事也循德者循天德而自然也循乎自然而無
所容力譬如人登小山有足行者皆自至人以為勤
勞而後至言不必勤勞其心而行亦自至也此無容
心之喻也丘小山也

故其好之也一其弗好之也一其一也一其不一也一

其一與天為徒其不一與人為徒天與人不相勝也是之謂真人

一自然也造化也好與弗好即好惡也其一同也其不一異也好惡之有異同皆不出乎造化之外故曰其一也一其不一也一人能以好惡為同則知天者也故曰其一與天為徒若以好惡為異則知人而不知天者故曰其不一與人為徒以人勝天不可也以天勝人亦不可也真人則無好無惡無異無同無分

於天人但循自然而已此釋氏所謂有無俱遣老子所謂兩者皆歸之玄故曰天人不相勝此乃一與不一皆一也一即大宗師也

死生命也其有夜旦之常天也人之有所不得與皆物之情也彼特以天為父而身猶愛之而況其卓乎人特以有君為愈乎已而身猶死之而況其真乎

死生猶旦夜也易曰通乎晝夜之道而知是也情實也人力所不得而預此則天地萬物之實理也曰命

曰天卽此實理也此數語蓋以死生之天命發明一
與不一之意曰父曰君人世之所尊愛莫大於此而
是道之大尤出於君父之上故曰可以爲衆父父故
曰其有真君存焉卓高也不可及也真自然也此語
蓋謂人皆知君知父而不知道之爲大宗師也

泉涸魚相與處於陸相呬以濕相濡以沫不如相忘於
江湖與其譽堯而非桀也不如兩忘而化其道夫大塊
載我以形勞我以生佚我以老息我以死故善吾生者

乃所以善吾死也

相响相濡口相向而相濡潤也處陸之相濡不如江湖之相忘喻人處世而有為不若體道而無為也譽堯非桀一句雖若不經此其獨見自得處無桀亦無堯無廢亦無興無善亦無惡無毀亦無譽毀譽廢興善惡皆相待而生與其分別於此不若兩忘而付之自然付之自然是化之以道也佛家曰是法平等無有高下又曰有無俱遣又曰大道無難惟嫌揀擇皆

此意也兩箇泥牛闖入海直到如今無消息一語最佳大塊天地也有形而後有生生則不能無勞老而筋力衰則自然安佚矣息者休止也善吾生者全吾身也所謂朝聞道夕死可矣是也

夫藏舟於壑藏山於澤謂之固矣然而夜半有力者負之而走昧者不知也藏小大有宜猶有所遯若夫藏天下於天下而不得所遯是恒物之大情也特犯人之形而猶喜之若人之形者萬化而未始有極也其為樂可

勝計邪故聖人將遊於物之所不得遯而皆存善夭善老善始善終人猶效之又況萬物之所係而一化之所待乎

壑中之舟澤中之山可謂藏之固密而有時乎失之夜半有力言造化也負之而走失也言人之為計雖至深密而時有不得自由者所謂打鐵作門限鬼見拍手笑便是昧者不知也小大舟壑山澤也壑之大可以藏舟澤之大可以藏山以大藏小是有宜也遯

失也藏天下於天下付之自然也凡在天之下者皆付之於天則無所遯矣萬物之真實處常如此故曰常物之大情也人皆以有形自喜而不知人之一身千變萬化安知其所止苟能知之則萬物皆備於我天地與我為一其樂可勝計哉聖人遊心於自然則無得無喪故曰遊於物之所不得遯而皆存善夭善老善始善終造物也善者能也言造物能此人猶效法之況道乎萬物之所繫者道也一化之所待者道

也此所謂大宗師也說得一節高一節此是莊子之筆勢若聖賢之言則平易而已

夫道有情有信無為無形可傳而不可受可得而不可見自本自根未有天地自古以固存神鬼神帝生天生地在太極之先而不為高在六極之下而不為深先天地生而不為久長於上古而不為老

前段不說道字到此方提起一道字說大宗師也情實也信亦實也無為無下手處也無形無方體也可

傳不可受可得不可見此兩句非知道者不知之關
尹子有一章發得傳授字甚好自本自根推原其始
也推原此道之始則自古未有天地之時此道已存
矣是曰無極而太極也鬼造化之迹也帝猶易曰帝
出乎震之帝也鬼之與帝所以能神者此道為之天
地亦因道而後有故曰生天生地易有太極是生兩
儀是也不為高不為深不為久不為老四句發得越
痛快六極六合也

侏韋氏得之以挈天地伏戲得之以襲氣母維斗得之
終古不忒日月得之終古不息堪坯得之以襲崑崙馮
夷得之以遊大川肩吾得之以處大山黃帝得之以登
雲天顓頊得之以處玄宮禹強得之立乎北極西王母
得之坐乎少廣莫知其始莫知其終彭祖得之上及有
虞下及五伯傳說得之以相武丁奄有天下乘東維騎
箕尾而比於列星

自侏韋氏而下有十三箇得字皆言得此道而後能

如此也。猗韋氏古帝王也。挈天地猶言整齊乾坤也。氣母元氣也。襲合陰陽之氣而在我也。此又是脩煉家之所祖。堪垓山神襲崑崙有崑崙也。馮夷水神肩吾太山之神。黃帝登雲天鼎湖之事也。玄宮猶今太清真境。禺强北方之神也。少廣神僊之居也。人莫知始終八字意同。而句有長短。此文法也。十三句之中却以日月斗入其間。又以彭祖傳說證諸其後。此是其筆端踰越規矩處。不可以聖賢之書律之。當另作

一眼看

南伯子葵問乎女偶曰子之年長矣而色若孺子何也
曰吾聞道矣南伯子葵曰可得學耶曰惡惡可子非其
人也夫卜梁倚有聖人之才而無聖人之道我有聖人
之道而無聖人之才吾欲以教之庶幾其果為聖人乎
不然以聖人之道告聖人之才亦易矣吾猶守而告之
叁日而後能外天下已外天下矣吾又守之七日而後
能外物已外物矣吾又守之九日而後能外生已外生

矣而後能朝徹朝徹而後能見獨見獨而後能無古今
無古今而後能入於不死不生殺生者不死生生者不
生其為物無不將也無不迎也無不毀也無不成也其
名為撓寧撓寧也者撓而後成者也南伯子葵曰子獨
惡乎聞之曰聞諸副墨之子副墨之子聞諸洛誦之孫
洛誦之孫聞之瞻明瞻明聞之聶許聶許聞之需役需
役聞之於謳於謳聞之玄冥玄冥聞之參寥參寥聞之
疑始

子葵女偶皆是寓言年長而有孺子之色此令脩煉
家之說聖人之才聖人之道如此分別兩句極佳非
莊子不能道前此未有也道與才俱全五帝三王之
外伊尹周公孔子而已三日七日九日不必強分解
不過謂一節高一節耳外生者遺其身也朝徹者胸
中朗然如在天平旦澄徹之氣也見獨者自見而人
不見也無古今則無死生又把殺生字說不死生生
字說不生此其筆端鼓舞之常法言雖殺之而不為

死生之而不為生也將送也無迎送無成毀即是自然
然而然也攫者拂也雖攫攫汨亂之中而其定者常在
寧定也攫攫而後見其寧定故曰攫寧攫寧也者攫而
後成此名也

九箇聞字真是奇絕副墨文字也因有言而後書之
簡冊故曰副墨形之言正也書之副墨也洛誦者苞
絡而誦之也依文而讀背文而誦猶子生孫故下子
孫兩字瞻者見也見徹而曰瞻明聶與囁同以言自

許故曰聶許役者行使也需待也可以待時而行使也故曰需役於謳者言之不足而永歌之也於嗟嘆也言其自得之樂也凡此數句謂道是讀書而後有得做出許多名字也是奇特到了却歸之造物玄冥有氣之始參寥無名之始疑始又是無始之始即所謂有始也者有未始有始也者有未始有夫未始有始也者此意盖言道雖得之於文字實吾性天之所自有者也

子祀子輿子犁子來四人相與語曰孰能以無為首以
生為脊以死為尻孰知死生存亡之一體者吾與之友
矣四人相視而笑莫逆於心遂相與為友俄而子輿有
病子祀往問之曰偉哉夫造物者將以予為此拘拘也
曲僂發背上有五管頤隱於齊肩高於頂句贅指天陰
陽之氣有沴其心閒而無事跼蹐而鑑於井曰嗟乎夫
造物者又將以予為此拘拘也子祀曰女惡之乎曰亡
予何惡浸假而化予之左臂以為雞予因以求時夜浸

假而化予之右臂以為彈予因以求鷄炙浸假而化予之尻以為輪以神為馬予因而乘之豈更駕哉且夫得者時也失者順也安時而處順哀樂不能入也此古之所謂縣解也而不能自解者物有結之且夫物不勝天久矣吾又何惡焉

首脊尻只是首尾始終之意無者自無而後有也既有有而後有生死也莫逆於心心皆自悟而相契相順也偉哉造物者言造化之大也拘拘者病之狀也

曲僂曲身貌發背瘡也五管瘡之發處也頤下而隱
於臍肩聳而高於頂皆形容其病軀之狀句贅髻也
指天露頂也在身陰陽之氣不和而後成病故曰有
疹其心聞而無事不以病為憂也跼蹐扶曳而行之
貌自照于井而見其形嘆曰使我為此拘拘者造物
也女惡之乎此子祀戲問之也假使也浸漸也此一
段最奇只浸假二字便自奇特言假使造物漸漸以
予之身化而為他物吾亦將因而用之此即順造化

而無好惡之意是雖寓言亦自有理得者時失者順
即前所謂適來夫子時也適去夫子順也亦是說死
生之理縣解者言其心無所繫著也苟為物所着則
不能自釋故曰不能自解物有結之萬物豈能勝天
此皆安於自然之意自然之天即大宗師也樂軒嘗
云莊子三十二篇只是自然兩字

俄而子來有病喘喘然將死其妻子環而泣之子犁往問
之曰叱避無怛化倚其戶與之語曰偉哉造化又將奚

以汝為將奚以汝適以汝為鼠肝乎以汝為蟲臂乎子
來曰父母於子東西南北唯命之從陰陽於人不翅於
父母彼近吾死而我不聽我則捍矣彼何罪焉夫大塊
載我以形勞我以生佚我以老息我以死故善吾生者
乃所以善吾死也今大冶鑄金金踴躍曰我且必為鏐
鄒大冶必以為不祥之金今一犯人之形而曰人耳人
耳夫造化者必以為不祥之人今一以天地為大鑪以
造化為大冶惡乎往而不可哉成然寐遽然覺

曾子之易簣其言如許聖賢之學也莊子為此論又
自豪傑叱者呵止之聲避者使其妻子遠去也怛驚
也謂其無以哭泣而驚怛將化之人鼠肝蟲臂言至
小之物也便是趙州火燒過後成一株茅葦之論但
其文奇唯命之從我不聽則為捍逆亦前段物不能
勝天之意鑄金之喻亦自奇絕賈誼曰陰陽為炭萬
物為銅皆自此中抽繹出金若能言人則必以為怪
造物之視人亦猶大冶之視金此等譬喻非莊子孰

能之成安也成然寐之狀也遽然覺之狀也以生為
寐以死為覺却下六字如此結上一段真文之奇處
子桑戶孟子反子琴張三人相與友曰孰能相與於無
相與相為於無相為孰能登天遊霧撓挑無極相忘以
生無所終窮三人相視而笑莫逆於心遂相與友莫然
有間而子桑戶死未葬孔子聞之使子貢往待事焉或
編曲或鼓琴相和而歌曰嗟來桑戶乎嗟來桑戶乎而
已反其真而我猶為人椅子貢趨而進曰敢問臨尸而

歌禮乎二人相視而笑曰是惡知禮意

相與於無相與相與於無心也相為於無相為無為而為也撓挑踴躍之意無極無止也登天遊霧遊於物之外也相忘以生無所終窮即所謂不忘其所始不求其所終也彼言不忘此言相忘則此八字只是不求其所終五字也莫然冲漠無有之貌有間有頃也往待事猶助原壤沐桴也編曲織箔也或編曲或鼓琴指孟子反子琴張而言也猗助語也嗟來歌者

發聲之詞也反其真猶言復其初也我猶為人猗便是忽聽上方鐘鼓動又添一日在浮生此等皆其文之奇處禮意猶言禮之本也莊子雖為寓言而禮記所載原壤耷首之歌則知天地之間自古以來有此一等離世絕俗之學今人但云佛至明帝時始入中國不知此等人不待學佛而後有也

子貢反以告孔子曰彼何人者邪脩行無有而外其形骸臨尸而歌顏色不變無以命之彼何人者邪孔子曰

彼遊方之外者也而丘遊方之內者也外內不相及而
丘使女往弔之丘則陋矣彼方且與造物者為人而遊
乎天地之一氣彼以生為附贅縣疣以死為決疝潰癰
夫若然者又惡知死生先後之所在假於異物托於同
體忘其肝膽遺其耳目反復終始不知端倪茫然彷徨
乎塵垢之外逍遙乎無為之業彼又惡能憤憤然為世
俗之禮以觀衆人之耳目哉

脩行無有言無德行也無以命之猶言喚作何人始

得方外方內猶今釋氏所謂世間法出世間法也意趣既不同而使汝弔之我則失矣故曰外內不相及而某使汝往弔之某則陋矣與造物者為人只是與造物為友遊乎天地之一氣言遊於造物之初附贅縣疣喻此身為天地間長物必決之潰之而後快即勞我以生息我以死之意假於異物便是圓覺地水火風之論四大合而為身故曰托於同體雖肝膽耳目亦不自知即忘身之意也反復終始不知端倪謂

原始要終而不見其初也彷徨浮遊之意茫然無所
見知之貌塵垢之外即方之外也無為之業即自然
也瞢瞢然自昏之貌為世俗之耳目而行禮徒自昏
勞此老子禮以強世之意觀者示也音貫

子貢曰然則夫子何方之依曰丘天之戮民也雖然吾
與汝共之子貢曰敢問其方孔子曰魚相造乎水人相
造乎道相造乎水者穿池而養給相造乎道者無事而
生定故曰魚相忘乎江湖人相忘乎道術子貢曰敢問

畸人曰畸人者畸於人而侔於天故曰天之小人人之君子人之君子天之小人也

何方之依者夫子所依行者方外耶方內耶天之戮民即前所謂天刑之而安可解也謂我不得為方外之人也吾與汝共之者欲與之言方外之樂也敢問其方猶問其故也魚相造乎水即相濡以沫不若相忘於江湖之意穿池而養亦自以為給足言得水不拘多少也得道則隨其分量以為生無事而自定無

事無為也畸人畸者獨也言獨異之人也侔合也畸則不偶於人而合於天天以為君子則人以為小人以為君子則天以為小人矣莊子之所謂君子者有譏侮聖賢之意在於其間蓋以禮樂法度皆非出於自然必剖斗折衡使民不爭而後為天之君子也此亦憤世疾邪而有此過高之論

顏淵問仲尼曰孟孫才其母死哭泣無涕中心不感居喪不哀無是三者以善喪蓋魯國固有無其實而得其

名者乎曰壹怪之仲尼曰夫孟孫氏盡之矣進於知矣
唯簡之而不得夫已有所簡矣孟孫氏不知所以生不
知所以死不知就先不知就後若化為物以待其所不
知之化已乎且方將化惡知不化哉方將不化惡知已
化哉吾特與汝其夢未始覺者邪

蓋魯國者以善喪之名高於一國也壹猶常也言某
常怪之也言怪訝之久矣進於知者言其進進而知
道也簡之而不得謂居喪之禮如哭泣之事猶欲簡

去而不得也雖欲簡不得而其所為已為甚簡故曰夫已有所簡矣不知所以生不知所以死即反覆終始不知端倪之意就先即始也就後即終也順造化而為萬物故曰若化為物以待其所不知之化言聽其自然也已乎助語也既聽其自然則安知將化已化與不化哉此類皆其鼓舞發越之語彼既知道能聽其自然而我乃怪之是我之夢未覺也

且彼有駭形而無損心有旦宅而無情死孟孫氏特覺

人哭亦哭是自其所以乃

駭形者形有老少之變也老少之變雖可駭異而其
心閒而無事故曰無損心宅居也旦生也死生旦夜
也知生之所居者暫則雖死而非實死也故曰無情
死情實也特覺人哭亦哭言隨衆也此是其欲簡而
不得之處是自其所以乃此六字最奇言其自得之
妙所以欲簡不得簡而乃隨衆以哭也此句最難解
故數本以上句乃字與下句且字合為宜也兩字良

可笑也

且也相與吾之耳矣庸詎知吾所謂吾之乎

且也只是且字添一也字前篇中屢有之矣吾者我也且今之相與既以我而怪之又安知我之所謂我果如何邪故曰且也相與吾之耳矣庸詎知吾所謂吾之乎莊子大抵如此鼓舞其文若非別具一隻眼者亦難讀也

且汝夢為鳥而厲乎天夢為魚而沒於淵不識今之言

者其覺者乎其夢者乎造適不及笑獻笑不及排安排而去化乃入於寥天一

夢鳥夢魚只是前篇化蝶之意今之言者其覺乎其夢乎即所謂蝶夢為周乎周夢為蝶乎意有所適有時而不及笑者言適之甚也亦猶杜詩所謂驚定乃拭淚也樂軒先生亦曰及我能哭驚已定矣此言驚也造適言喜也驚喜雖異而不及之意同排安排也因物而笑是物獻笑於我此笑出於自然何待安排

故曰獻笑不及排此排字與下句排字雖同而文勢異不可聯上字說造物之間事事皆排定死生窮達得喪禍福皆已定矣我但安其所排隨造化而去乃可以入於造化之妙矣寥天一只是造化字寥遠也寥天之一即前所謂其好也一其不好也一之一也又做成名字如此皆莊子弄筆處

意而子見許由許由曰堯何以資汝意而子曰堯謂我汝必躬服仁義而明言是非許由曰而奚來為軼夫堯

既已黥汝以仁義而劓汝以是非矣汝將何以遊夫遙
蕩恣睢轉徙之塗乎意而子曰雖然吾願遊其藩許由
曰不然夫盲者無以與乎眉目顏色之好瞽者無以與
乎青黃黼黻之觀意而子曰夫無莊之失其美據梁之
失其力黃帝之亡其知皆在鑪錘之間耳庸詎知夫造
物者之不息我黥而補我劓使我乘成以隨先生邪許
由曰噫未可知也我為汝言其大略吾師乎吾師乎螯
萬物而不為義澤及萬世而不為仁長於上古而不為

老覆載天地刻雕衆形而不為巧此所遊已

資汝者教汝也明言是非辨別是非也為助語也軼
亦助語也奚來為何必來也黥劓點污汝也猶言汝
被他教壞了遙蕩恣睢轉徙猶前所謂撓挑無極彷徨
塵垢之外之意遙蕩放蕩也恣睢縱橫也轉徙變動也
藩者藩籬也言我不敢求其堂奧且願至於藩籬即是
願聞其略如此翻下盲者瞽者之喻謂汝無資質不足
以聞道也無莊古之美者也據梁古之勇

者也言汝能有道而化我使美者不知其美勇者不知其勇知者不知其知去故習而自悟在汝轉移之間故曰皆在鑪錘乘行也成自然之理也去我前日之習而行乎自然以事先生故曰息我黜補我剏使我乘成以隨先生也噫嘆也未可知者言未見得汝便能如此也吾師乎以下數句方是說出箇篇名大宗師字整粉萬物而不可名以義澤及萬世而不可名以仁蓋言無為而為自然而然我無容心故不得

以此名之易曰鼓萬物而不與聖人同憂亦是此意
長於上古言在天地之先也千古萬古常如此安得
以老少名之上而天之所覆日月星辰下而地之所
載山川丘陵多少是巧且如天左旋經星貼天而不
動日月五星乃右轉或遲或速或流或伏川岩水石
多少奇怪皆造物為之衆形之間如百卉羣木多少
奇異非巧而何但喚做巧不得凡此數句皆是形容
自然之道遊心於自然則見天地與我並生萬物與

我為一故曰此所遊已言吾之所遊者如此也

顏回曰回益矣仲尼曰何謂也曰回忘仁義矣曰可矣
猶未也它日復見曰回益矣何謂也曰回忘禮樂矣曰
可矣猶未也它日復見曰回益矣曰何謂也曰回坐忘
矣仲尼莞然曰何謂坐忘顏回曰墮肢體黜聰明離形
去知同於大通此謂坐忘仲尼曰同則無好也化則無
常也而果其賢乎丘也請從而後也

此一段借顏子之名以形容造道之妙畢竟莊子在

當時亦知顏子之為亞聖也坐忘之說乃莊子之說
以此求顏子則誤矣益者言有所得也先仁義而後
禮樂是以禮樂為高於仁義一節蓋莊子仁義二字
只為愛惡凡此字義皆與聖賢不同先忘仁義而又
至於忘禮樂亦猶所謂外天下而後萬物也至於坐
忘則盡忘之矣此有無俱遣之時所謂今者吾喪我
亦是此意四肢耳目皆不自知故曰墮枝體黜聰明
離形墮枝體也去智黜聰明也太通即大道也所謂

聖者無所不通睿作聖睿即通也觀此坐忘二字便是禪家面壁一段公案同者與道為一也與道為一則無好惡矣無好惡則化矣化則無所住而生其心矣故曰同則無好化則無常請從而後者言汝更勝於我我反不及而在汝後矣賢者勝也此賢於人之賢也

子輿與子桑友而淋雨十日子輿曰子桑殆病矣裹飯而往食之至子桑之門則若歌若哭鼓琴曰父邪母邪

天乎人乎有不任其聲而趨舉其詩焉子與入曰子之歌詩何故若是曰吾思夫使我至此極者而弗得也父母豈欲吾貧哉天無私覆地無私載天地豈私貧我哉求其為之者而不得也然而至此極者命也夫

此段只言窮達有命撰出這般說話也是奇絕恐其以飢而病故曰殆病矣古人彈琴必有歌如舜鼓琴而歌南風是也若歌若哭者力弱而其聲微也不任其聲者言無力聲不出也趨舉其詩所謂情隘而其

詞感是也歌得不成頭緒故曰趨舉父母豈欲貧我
天地豈欲貧我此數語最精絕求其為之不得
言既非天非地非父非母則孰為之然則使
我至此極甚者命也此意蓋謂自然之理
不假勉強無待思索在於天地之上命者自然之
理也猶命也即理也是所謂大宗師也夫學者有師
尤事服之不違人有大宗師可不惟命之從哉看
看莊子此篇便見列子力命篇不及多

矣

內篇應帝王第七

言帝王之道合應如此也

齧缺問於王倪四問而四不知齧缺因躍而大喜行以告蒲衣子蒲衣子曰而乃今知之乎有虞氏不及泰氏有虞氏其猶藏仁以要人亦得人矣而未始出於非人泰氏其卧徐徐其覺于于一以已為馬一以已為牛其知情信其德甚真而非始入於非人

四問而四以不知答之即維摩經以不言為不二法門之意蒲衣
或曰即被衣也莊子所言人物名字多是虛言即烏有亡是公之類
不必致辯蓋缺悟其不言之意故喜以告蒲衣蒲衣曰而乃今知之者
言汝于今方悟也而汝也秦氏古帝王也即大庭氏之類藏懷也要結也以仁而結
人之心亦可以得人不出於如天而已謂其但能與天為徒也非人即天也故曰未
始出於非人未始出猶曰不過如此也不曰天而曰非人皆是其奇筆處其卧徐徐
安也其覺于于自得也豈為馬或以已為牛皆置之不問言
聽人誰何也其所知皆實理情信皆實也其德在已

皆天真也到此處天字又不足以名之是其任自然
而然又出於造化之上故曰未始入於非人前曰出
後曰入看他下字處帝王之道任自然而已其名篇
以應帝王意正在此

肩吾見狂接輿狂接輿曰日中始何以語汝肩吾曰告
我君人者以已出經式義度人孰敢不聽而化諸狂接
輿曰是欺德也其於治天下也猶涉海鑿河而使蜚負
山也夫聖人之治也治外乎正而後行確乎能其事者

而已矣且鳥高飛以避矰弋之害鼯鼠深穴乎神丘之下以避熏鑿之患而曾二虫之無知

肩吾先見日中始後見狂接輿故接輿以此問之經常也式法也義處事之宜也以經式義皆出於已言以身為天下法也度人者化人也以身法而化天下故曰以已出經式義度人經式義句法便與和豫通同度音渡孰敢不聽而化言民皆聽順而化之也欺德者言自欺也非實德也欲以此治天下難於涉海

鑿河而使蚩虫負山也鑿河即是疏九河之類治外
者言化之以心則無迹化之以身則有迹也正而後
行者順性命之理而行也能其事者盡此自然之事
也確乎斷乎也言其為治斷斷乎如此莊子之意主
於無為故其說如此所以異於吾儒鳥高飛而避矰
繳鼠深穴而避熏鑿言有迹者必自累今不能行無
為之化而至於有迹是其無知之愚猶不若二虫也
二虫鳥鼠也神丘猶曰神臯也

天根遊於殷陽至蓼水之上適遭無名人而問焉曰請問為天下無名人曰去汝鄙人也何問之不豫也予方將與造物者為人厭則又乘夫莽眇之鳥以出六極之外而遊無何有之鄉以處壙垠之野汝又何帛以治天下感予之心為又復問無名人曰汝遊心於淡合氣於漠順物自然而無容私焉而天下治矣

以為天下為問便非無為而為之道故以為鄙人之問而使我不豫不豫者不樂也與造物為人者言處

於人世而順造物之自然也厭足也飽也言遊於人世既已飽足則將遊於造物之外莽眇之鳥虛無之氣也無何有之鄉壙琅之野皆言太虛無極之地也何帛猶何故也注訓法字法亦故也以治天下之問而感觸予之心所以不豫此感字猶言激觸我也帛字崔氏作為亦是何故之意淡者恬淡也漠冲漠無形之地也氣猶性也以此心此性皆合於自然故曰遊心於淡合氣於漠前言無聽之以心而聽之以氣

看此氣字便合作性字說順造物之自然而無容心
則天下自治矣何必為天下乎有心則私矣此天根
再問而無名人又以其真實語告之其名曰無名人
便見前後所稱人名皆是子虛烏有之類所以後篇
有寓言重言之說如稱黃帝孔子顏子狂接輿則是
借重於其名以實己之說寓言則是無名人天根蒲
衣子之類

陽子居見老聃曰有人於此嚮疾彊梁物徹疏明學道

不勸如是者可比明王乎老聃曰是於聖人也胥易技
條勞形怵心者也且也虎豹之文來田猿狙之便執爨
之狗來藉如是者可比明王乎陽子居感然曰敢問明
王之治老聃曰明王之治功蓋天下而似不自已化貸
萬物而民弗恃有莫舉名使物自喜立乎不測而遊於
無有者也

有人於此言有箇人如此也此數句是不指名而譏
侮孔子嚮疾趨走捷疾也強梁剛健也言敏於學而

能力行也物事也徹通也言事事通徹而所見虛明也疏虛也以此而學道不勸可以比明王否言學之為王者事如此可否胥刑徒也易更也猶言卒更也胥易之名必古有此語如漢所謂鬼薪是也技係者以工巧而係累技術之人也此二等人胥易則勞其形技係則怵其心言如此為學身心俱勞是猶胥易技係而已怵心言其心恐恐然也虎豹以皮有文故招來田獵之人藉繩也所以束縛者也簾合作狸狗

能執狸與猿狙之便捷可觀皆以招來束縛之禍言
有能必自累也執狸字又見天地篇若以有為之學
可以為王者事則是虎豹之類亦可比於明王矣此
貶之之甚之辭也此三句文自竒功蓋天下而似不
自己即功成而不有之意化貸萬物而民弗恃此朝
野不知而帝力何加之意貸施也言施化於民也凡
字訓釋亦就平仄處呼施字便與施字同義天施地
生雲行雨施天施雨施此二字平仄雖殊其義則一

有莫舉名者言其所有人莫得而舉名之民無得稱之意使物自喜言我雖無功可名而物自得其樂猶韓文所謂人自得於江湖之外也不測者不可測識也只是無有字立乎不測只是游於無有筆端鼓舞大率如此以上數段皆是說其名篇應帝王之意

鄭有神巫曰季咸知人之死生存亡禍福壽夭期以歲月旬日若神鄭人見之皆棄而走列子見之而心醉歸以告壺子曰始吾以夫子之道為至矣則又有至焉者

矣壺子曰吾與汝既其文未既其實而固得道與衆雌而無雄而又奚卵焉而以道與世亢必信夫故使人得而相汝

歲月旬日或遠或近神巫相者也其言皆驗若神棄之而走者畏其言之驗也心醉者心服也既其文盡其外也未既其實未盡其內也而汝也汝未嘗盡見其實固以為能得道乎固字有未得謂得之意當以語勢思之有雌雄而後有所生卵生也無雄又奚卵

言無心則無迹也此一句是喻其心未能化故可以形見之意亢高也自以其道為高於世而欲人必信之此便是有迹處便是未化處故神巫得以相汝嘗試與來以予示之明日列子與之見壺子出而謂列子曰嘻子之先生死矣弗活矣不以旬數矣吾見恠焉見濕灰焉列子入泣涕沾襟以告壺子壺子曰嚮吾示之以地文萌乎不震不正是殆見吾杜德機也

濕灰者言其生氣將盡如灰已濕而欲滅也地文者

此猶禪家脩觀之名萌乎若生而不生之意不震者
不動也不正者不可指定言也此不正字便與孟子
必有事焉而勿正同惟有若萌動而又不動故神坐
以為濕灰活火也濕灰則是活火欲滅之意杜德
機亦是脩觀之名德機生意也杜閉也閉其機而不
動故有生意欲滅之狀李咸遂以為弗活矣

嘗又與來明日又與之見壺子出而謂列子曰幸矣子
之先生過我也有瘳矣全然有生矣吾見其杜權矣列

子入以告壺子壺子曰鄉吾示之以天壤名實不入而機發於踵是殆見吾善者機也

杜權不動之動也權與機同但機微而權則露矣於杜閉之中而動機已露故季咸以為全然有生意也天壤亦是觀名天田也天上之田非壤之壤即自然之壤也猶今脩養家以舌間為天津以頂上為泥丸之類此是生意萌動而上之意名實不入即是有無俱遣機發於踵言其氣自下而上微而不可見故曰

機善者機猶言性之動處也

嘗又與來明日又與之見壺子出而謂列子曰子之先生不齊吾無得而相焉試齊且復相之列子入以告壺子壺子曰吾鄉示以太沖莫勝是殆見吾衡氣機也

太沖莫勝亦觀名也太沖太虛也莫勝不可捉摸也
衡者平也半也氣機之動至於衡平一半之地而止
則是半動半靜也神巫以為不齊言其半動半靜而
不定也

鯢桓之審為淵止水之審為淵流水之審為淵淵有九名此處三焉

鯢桓止水流水皆是觀名今佛家以為觀而古人以為淵淵有九名猶今觀音十二觀也審信也言鯢桓信乎為一觀止水信乎為一觀流水信乎為一觀壺子到此方說出向者所以示神巫者皆此淵也我有九淵而方示其三言我之妙處猶有未盡者審字作蟠非列子九淵之名皆全洪野處謂列子勝於莊子

恐未為的論若此九淵皆說盡則不得為奇文矣可
盡不盡正是莊子之奇處精論文者方知之此章本
有四節就此說淵九名一項却入第四節文章伸縮
之法也

嘗又與來明日又與之見壺子立未定自失而走壺子
曰追之列子追之不及反以報壺子曰已滅矣已失矣
吾弗及已壺子曰鄉吾示之以未始出吾宗吾與之虛
而委蛇不知其誰何因以為弟靡因以為波流故逃也

已滅已失言不可見也未始出吾宗亦是觀名虛虛
無也委蛇順也若無物若有物不知其如何故曰不
知其誰何也弟音頽弟靡者拉扱也波流者奔蕩也
言其看我不出但見拉扱奔蕩故自失而走也

然後列子自以為未始學而歸三年不出為其妻爨食
豕如食人於事無與親彫琢復朴塊然獨以其形立紛
而封哉一以是終

為其妻爨代其妻執爨於鼎竈之間而不出也食豕

如食人言集神於內而不見其外也於事無與親者
言其雖為事而不自知若不親為之也彫琢其聰明
而歸復於朴即前所謂墮枝體黜聰明也塊然獨以
其形立猶木偶人也封有廉隅也紛多也其形已如
木偶安有封畛廉隅之多乎一以是終者言其終身
常如此也一常如此之意

無為名尸無為謀府無為事任無為知主體盡無窮而
遊無朕盡其所受乎天而無見得亦虛而已至人之用

心若鏡不將不迎應而不藏故能勝物而不傷

莊子於此又說盡無為而為之事尸主也不以名為主是為善無近名也府聚也前言不謬事不謀焉用智即是此意有意於謀則是謀聚於此可謀則謀無所用心故曰無為謀府事雖不可不為而不以事自任故曰無為事任人雖不能無智而不以智為主故曰無為知主心有所主則私矣此四箇無字是教人禁止之意與論語四勿字同體察也見也見道至於

盡而無窮極而心遊於無物之始故曰體盡無窮而
遊無朕朕兆也始也無朕即無始也天之受我以是
理吾能盡之又不自以為有得故曰盡其所受於天
而無見得見其有得則近於迹矣佛經所謂依幻說
覺亦復如是便是此意鋪說至此以一虛字結之此
一句甚有力虛即自然也無所着也鏡之於物妍媸
去來照者自照何嘗將之何嘗迎之將送也照形而
見形照物而見物謂之應鏡中何嘗留之故曰應而

不藏至人之心如此所以於物皆無所忤故曰勝物而不傷天道不爭而善勝便是此勝字若鏡數句分明是解上面一虛字文勢起伏豈不奇哉平淡之中自有神巧此等文字也

南海之帝為儵北海之帝為忽中央之帝為渾沌儵與忽時相與遇於渾沌之地渾沌待之甚善儵與忽謀報渾沌之德曰人皆有七竅以視聽食息此獨無有嘗試鑿之日鑿一竅七日而渾沌死

此段只言聰明能為身累故如此形容墮枝體黜聰
明則為渾沌矣本是平常說話粧出日鑿一竅之說
皆奇筆也儵忽渾沌皆是寓言不可泥着泥着則為
癡人前說夢矣渾沌即元氣也人身皆有七竅如赤
子之初耳目鼻舌雖具而未有知識是渾沌之全也
知識稍萌則有喜怒好惡是竅鑿矣孟子曰大人不
失赤子之心便是渾沌不鑿也莊子翻說得來便如
此詭怪但文亦奇矣

莊子三十二篇分為內外內篇有七皆以三字名之
自駢拇而下則只掇篇頭兩字或三字為名如學而
為政之例其書本無精粗內篇外篇皆是一樣說話
特地如此亦是鼓舞萬世之意但外篇文字間有長
枝大葉處或以為內篇文精外篇文粗不然也又有
以七篇之名次第而說如曰先能逍遙遊而後可以
齊物論既能齊物又當自養其身故以養生主繼之
既盡養生之事而後遊於世間故以人間世繼之遊

於世間使人皆歸向於我故以德充符繼之內德既充而符應於外也人師於我而我自以道為師故以大宗師繼之既有此道則可以為帝王之師故以應帝王繼之雖其說亦通但如此拘牽無甚義理却與易之序卦不同善讀莊子却不在此但看得中間文字筆勢出自無窮快活

文字最看歸結處如上七篇篇篇結得別逍遙遊之有用無用齊物論之夢蝶物化養生主之火傳也德

充符之以堅白鳴人世間之命也夫自是箇箇有意
到七篇都盡却粧撰儵忽渾沌一段乃結之曰七日
而渾沌死看他如此機軸豈不奇特中庸一篇起以
天命之謂性三句結以上天之載無聲無臭至矣此
亦是文章機軸但人不如此看得破耳向侍我先師
講春秋至西狩獲麟時先師曰及其至也聖人有所
不知所以絕筆於此是夜散行西軒廊間忽問曰今
日獲麟處看得如何希逸應曰以中庸聖人所不知

之語斷之諸家所未有也但經始於王正月終於西狩獲麟當時下面若更有一句夫子亦必不書矣時先師曰如何希逸曰如此歸結一句更如何添得了先師不答而出已夜深矣即叩伯已丘丈之門曰肅翁春秋讀得甚好某與朋友讀春秋許多年未有如此見解者言之喜甚至半夜方歸後兩日伯已丘丈與希逸言之

外篇駢拇第八

駢拇枝指出乎性哉而侈於德附贅縣疣出乎形哉而侈於性多方乎仁義而用之者列於五藏哉而非道德之正也是故駢於足者連無用之肉也枝於手者樹無用之指也多方駢枝於五藏之情者淫僻於仁義之行而多方於聰明之用也

拇足大指也指手指也駢合也枝旁生也與生俱生曰性人所同得曰德駢拇枝指皆病也本出於自然比人所同得者則為侈矣侈剩也似此性德字義皆

與聖賢稍異附贅縣疣亦病也駢枝則生而有之贅
疣生於有形之後故曰出於形而侈於性多方多端
也用之用之於外也列於五藏哉言非出於內也非
道之自然故曰非道德之正告子言義外莊子則併
以仁為外矣以仁義為淫僻而與聰明並言皆以為
非務內之學故但見其多事多方猶多事也

是故駢於明者亂五色淫文章青黃黼黻之煌煌非乎
而離朱是已多於聰者亂五聲淫六律金石絲竹黃鍾

大呂之聲非乎而師曠是已枝於仁者擢德塞性以収
名聲使天下簧鼓以奉不及之法非乎而曹史是已駢
於辯者縈瓦結繩竄句遊心於堅白同異之間而敝跬
譽無用之言非乎而楊墨是已故此皆多駢旁枝之道
非天下之至正也

五色文章青黃黼黻古者以養目而莊子以為亂淫
故曰駢於明即老子五色令人目盲之意離朱明者
也若以為非乎而用明之人則以為是矣故曰非乎

而離朱是已多於聰意亦然蓋以禮樂為外物也擢
拙也塞猶言茅塞也德性本靜而強於為仁是擢德
而塞性也法禮法也不及者人所難及也使人行難
行之法故曰使天下簧鼓以奉不及之法簧鼓以言
語簧惑鼓動之也以瓦而累以繩而結事之無益者
辯者之多言連牽不已纍疊無窮而無意味故以纍
瓦結繩比之竄定猶言修改也修改其言句以為辯
故曰竄句游心於堅白同異之間敝勞也跬音企蹠

跂也其言皆無用而稱譽自喜徒自勞苦故曰敝跬以譽無用之言若以為非乎而楊墨之徒則以為是矣多駢旁枝猶言餘剩也自然之道本無多端此皆餘剩之事非至正也至正者本然之理也

彼至正者不失其性命之情故合者不為駢而枝者不為跂長者不為有餘短者不為不足是故鳧脰雖短續之則憂鶴脰雖長斷之則悲故性長非所斷性短非所續無所去憂也意仁義其非人情乎彼仁義何其多憂

也

至正者猶言自然而然而然則不失其性命之實理雖合而不為駢雖枝而不為跂雖長而不為有餘雖短而不為不足此數句極有味即前所謂天下莫大於秋毫之末而泰山為小也跂起也有所跂則不平貼不平貼則不自在看他這般下字豈苟然哉性長性短言長短出於本然之性也長短性所安無憂可去也鳬鶴之喻最佳意與噫同嘆也以鳬鶴

二端言之則仁義多端非人情矣故歎而言之使仁義出於自然則不如是其多憂矣多憂者言為仁義者多憂勞也莊子之為此言自孔孟而上以至堯舜禹湯皆在譏侮之數

且夫駢於拇者決之則泣枝於手者斷之則啼二者或有餘於數或不足於數其於憂一也今世之仁人蒿目而憂世之患不仁之人決性命之情而饗貴富故意仁義其非人情乎自三代以下者天下何其囂囂也

手足之駢枝雖皆為病而不可強去之去之則為憂
苦矣枝多一指也故曰有餘於數駢合二指而不可
分故曰不足於數蒿目者半閉其目也欲閉而不閉
則其睫蒙茸然故曰蒿目蒿者蓬蒿之蒿也蒿目有
獨坐憂愁之意此莊子下字處憂世之患而自勞仁
人也貪饕富貴而破壞其性情不仁之人也二者皆
為自苦故並言之又歎曰仁義非人情乎言如此看
來仁義信非出於本然也囂囂嘈雖也三代而下此

說盛行何其嘈雜也

且夫待鉤繩規矩而正者是削其性也待繩約膠漆而固者是侵其德也屈折禮樂响俞仁義以慰天下之心者此失其常然也

性自然也德自得於天也皆非人力所為若必待修為而後正則是自戕賊矣鉤繩繩約膠漆皆修為之喻也侵削戕賊也固定也屈折其身以為禮樂响俞其言以為仁義欲以此慰天下之心是皆失其本然

之理故曰失其常然响俞猶嫗撫也

天下有常然常然者曲者不以鉤直者不以繩圓者不以規方者不以矩附離不以膠漆約束不以縲索故天下誘然皆生而不知其所以生同焉皆得而不知其所以得故古今不二不可虧也則仁義又奚連連如膠漆縲索而遊乎道德之間為哉使天下惑也

常然以下數語與合者不為駢枝者不為跂以下意同曲直方圓或附或離或加約束皆當出於自然而

不用人力則為正理誘與莠同莠然而生者孰生之物之所同者孰與之皆自然也故曰不知其所生不知其所得古今不二者一也不可虧者亘古窮今不加損也連連不已也膠漆自固泥也纏索自拘束也離性以為仁義為之不已則固泥拘束何以遊於道德之門徒以惑天下也莊子與孟子同時孟子專言仁義莊子專言道德故其書專抑仁義而談自然亦有高妙處但言語多過當大抵莊子之所言仁義其

字義本與孟子不同讀者當知自分別可也

夫小惑易方大惑易性何以知其然邪自虞氏招仁義以撓天下也天下莫不奔命於仁義是非以仁義易其性與故嘗試論之自三代以下者天下莫不以物易其性矣小人則以身殉利士則以身殉名大夫則以身殉家聖人則以身殉天下故此數子者事業不同名聲異號其於傷性以身為殉一也

惑迷也方四方也小迷則東西南北易位矣大惑則

失天地之性矣借上句以形下句招猶今人言招牌也立仁義之名以撓亂天下使天下之人皆趨於仁義奔命為其所使而奔趨也知仁義而不知道德是以外物易其性也在小人則殉利在君子則殉名卿大夫則殉其家人主則殉天下殉從也忘其身以從之曰殉若莊子之意則天下國家名利均為外物也以天下國家與名利並言以小抑大以下抑高此書之中大抵如此數子者指上言聖人大夫士小人也

事業名聲雖不同而其忘身傷性則一此皆殉物之失也

臧與穀二人相與牧羊而俱亡其羊問臧奚事則挾策讀書問穀奚事則博塞以遊二人者事業不同其於亡羊均也伯夷死名於首陽之下盜跖死利於東陵之上二人者所死不同其於殘生傷性均也奚必伯夷之是而盜跖之非乎天下盡殉也彼其所殉仁義也則俗謂之君子其所殉貨財也則俗謂之小人其殉一也則有

君子焉有小人焉若其殘生損性則盜跖亦伯夷已又惡取君子小人於其間哉

博塞讀書二事之美惡不同而亡羊則均此喻最佳
挾筴即執卷也投瓊曰博不投瓊曰塞瓊猶今骰子
也亦曰齒亦曰目塞與賽同伯夷盜跖莊子豈不知
其賢否特借此以立言此皆是其過當處君子小人
雖異而殘生損性則一其意主於譏君子故借小人
以形之是皆以小抑大以下抑高之意也

且夫屬其性乎仁義者雖通如曾史非吾所謂臧也屬其性於五味雖通如俞兒非吾所謂臧也屬其性乎五聲雖通如師曠非吾所謂聰也屬其性乎五色雖通如離朱非吾所謂明也吾所謂臧非仁義之謂也臧於其德而已矣吾所謂臧者非所謂仁義之謂也任其性命之情而已矣吾所謂聰者非謂其聞彼也自聞而已矣吾所謂明者非謂其見彼也自見而已矣夫不自見而見彼不自得而得彼者是得人之得而不自得其得者

也適人之適而不自適其適者也夫適人之適而不自
適其適雖盜跖與伯夷是同為淫僻也余愧乎道德是
以上不敢為仁義之操而下不敢為淫僻之行也

屬性猶言留意也曾曾子也諱參史子魚也名鯀以
俞兒師曠離朱而比曾史亦是以下抑高之意臧善
也言雖如此非吾所善也善於其德任其性命之情
即順自然也此數語之中如所謂聰者非謂其聞彼
也自聞而已矣所謂明者非謂其見彼也自見而已

矣一大藏經不過此意安得此語若此等語皆其獨
到不可及處這一彼字不是輕可下得禪家所謂狂
夫逐塊所謂幻花又生幻果便是這箇彼字自得其
得自適其適即自見自悟也大抵分別本心與外物
耳不得其本心而馳騖於外則皆為淫僻矣自聞自
見若在吾書即論語所謂默而識之易所謂默而成
之不言而信孟子所謂施於四體不言而喻伊川春
秋傳序曰優游涵泳默識心通皆是此意但說得平

易爾晦翁懲象山之學謂江西學者皆揚眉瞬目自
說悟道深詆而力闢之故論語集解以識音志曰默
而記之爾孟子不言而喻亦曰不待人言而自喻不
肯說到頃悟處盖有所懲而然非語孟二書之本旨
也若以伊川默識心通之語觀之豈得音志乎然學
道者若用功之時常有等待通悟之心此尤不可所
謂執迷待悟則隔須彌山矣頃漸自有二機不可謂
有漸而無頃亦不必人人皆自頃悟得之仲弓之持

敬漸也顏子之克己復禮損也不然何以曰一日克己復禮天下歸仁焉仁何物也一日而得之非損悟而何看此數語先提起一句曰克己復禮為仁乃曰一日克己復禮天下歸仁焉又曰為仁由己由人乎哉語勢起伏便與禪家答話一同子細吟玩方見其味顏子既於言下領略乃曰請問其目此即禪家所謂如何保任之時四非四勿便是盡心知性知天之下繼以存心養性事天修身俟命之事也其曰為仁

由已即禪家所謂此事別人着力不得也先師嘗曰
佛書最好證吾書證則易曉也上不敢為仁義之操
是為善無近名也下不敢為淫僻之行是為惡無近
刑也道德自然也余恐有愧於道德雖不為近刑之
事亦不為近名之事近名則非自然矣故曰余愧乎
道德是以上不敢為仁義之操而下不敢為淫僻之
行也觀莊子此語何嘗不正心修身其戲侮堯舜夫
子曾史伯夷初非實論特鼓舞其筆端而已塘東劉

叔平向作莊騷同工異曲論曰莊周憤悱之雄也樂
軒先生甚取此語看來莊子亦是憤世疾邪而後著
此書其見既高其筆又奇所以有過當處太史公謂
其善屬書離辭指事類情用剝剝儒墨雖當世宿學
不能自解免也其言沆洋

上音汪
下音羊

自恣以適已此數

句真道着莊子

外篇馬蹄第九

馬蹄可以踐霜雪毛可以禦風寒藪草飲水翹足而陸

此馬之真性也雖有義

許宜反

臺路寢無所用之及至伯

樂曰我善治馬燒之剔之刻之錐之連之以羈馮

丁邑丁立

二編之以皁棧馬之死者十二三矣饑之渴之馳之驟

之整之齊之前有櫛飾之患而後有鞭筴之威而馬之死者已過半矣

此段言外物能為身累之意翹足而陸者凡馬立時其蹄必有跂起者也此是下句處義臺路寢即是王者之宮室也義者養也居移氣養移體之地必當時

有此二字燒剔治馬蹄也刻削也亦削其蹄也錐之
籠絡也羈絡其頭也韁絆其足也今所謂前鞅後鞅
也連列之也皐棧槽檻也衆馬列於其間也整齊排
布行列也楸街也飾鑣纓在領下故曰前有楸飾之
患馬制於人而不得自樂其樂所以死者多矣即元
龜與其曳尾於泥中意同但其間下數箇之字與前
言二三後言過半文字華密如美錦然古今多少筆
法自此萌芽而出或曰外篇文粗誤矣

陶者曰我善治埴圓者中規方者中矩匠人曰我善治木曲者中鉤直者應繩夫埴木之性豈欲中規矩鉤繩哉然且世世稱之曰伯樂善治馬而陶匠善治埴木此亦治天下者之過也

陶泥匠也匠木作也泥之與木皆人造之而成器亦猶馬之被燒剔刻錐馳驟整齊也豈不失土木之性人皆以伯樂陶匠為能亦猶泰氏而下以治天下為能也即前篇仁義非人情之意此三數行之文其意

不過如此但文字精好

吾意善治天下者不然彼民有常性織而衣耕而食是謂同德一而不黨命曰天放故至德之世其行填填其視顛顛當是時也山無蹊隧澤無舟梁萬物羣生連屬其鄉禽獸成羣草木遂長是故禽獸可係羈而遊鳥鵲之巢可攀援而闕夫至德之世國與禽獸居族與萬物並惡乎知君子小人哉同乎無知其德不離同乎無欲是謂素樸素樸而民性得矣

同德者得之於天者同然也人之生也各業其生或耕或織皆是自然天機故曰常性常性者即前篇所謂常然也黨偏也倚也純一而無所偏倚放肆自樂於自然之中故曰一而不黨命曰天放命曰猶言謂之也齊物論之天行天鈞天遊與此天放皆是莊子做此名字以形容自然之樂至德之世言上古也填填滿足之貌顛顛直視之貌形容其人樸拙無心之意又就其卧徐徐其覺于于應帝王中翻出此語山

無蹊隧路未通也澤無舟梁水路未通也人各隨其鄉而居自為連屬一鄉之中自有長幼上下相連屬也禽獸羣居深山去人尚遠無害之者草木各遂其生長未有斧斤之禍也羈係禽獸而遊攀引鵲巢而闕人與物相忘也東坡雜說有少時所居書室鳥雀巢於低枝桐花鳳四五日一至頗與此處相似見詩集二十八卷異巢詩注以此觀之上古之時必是如此禽獸可與同居萬物可與同聚又安有君子小人

之分族聚也並同也無知不識不知也無欲純乎天
理也舉世皆然故曰同乎無欲不離渾全也素樸純
質也當此之時各得其自然之樂故曰素樸而民性
得矣其德不離是謂素樸兩句相因而下句只用素
樸二字接過古文法也今人之文更無此等法度

及至聖人覽覽

上步結反
下悉結反

為仁踧踖為義而天下始疑

矣澶漫為樂摘僻為禮而天下始分矣故純樸不殘孰
為犧樽白玉不毀孰為主璋道德不廢安取仁義性情

不離安用禮樂五色不亂孰為文采五聲不亂孰應六律夫殘樸以為器工匠之罪也毀道德以為仁義聖人之過也

前言及至伯樂此言及至聖人以下段應上段也蹙蹙勉強而行之貌蹉跎行立不安之貌澶漫即汗漫也流蕩之意摘僻用手足之貌僻合作僻向音僻是也此又是自屈折禮樂响俞仁義中翻出言雖不經其文亦奇始分者言其心迹始分矣分則不純一矣


如此分字皆是下得好處樽刻木而為之故曰純樸
不殘孰為犧樽玉不琢不成器故曰白玉不毀孰為
珪璋道德自然也莊子以仁義為外故曰道德不廢
安取仁義性情固有也莊子以禮樂為強世故曰情
性不離安用禮樂若孟子曰節文斯二者樂斯二者
聖賢之言也此書禮樂仁義字義不同並以為外物
矣文米亂五色六律亂五聲皆是用人力非自然之
喻工匠之罪聖人之過兩句此上文結語也

夫馬陸居則食草飲水喜則交頸相靡怒則分背相踈
馬知已此矣夫加之以衡扼齊之以月題而馬知介倪
闔扼驚曼詭銜竊轡故馬之知而能至盜者伯樂之罪
也夫赫胥氏之時民居不知所為行不知所之含哺而
熙鼓腹而遊民能已此矣及至聖人屈折禮樂以匡天
下之形縣跂仁義以慰天下之心而民乃始踈跂好知
爭歸於利不可止也此亦聖人之過也

此一段又是把前頭許多說話翻做數行中間添得

幾句愈是奇特喜則交頸相靡怒則分背相踈分明
是一箇畫馬圖也相靡相摩擦也看他交頸分背字
下得如何衡扼車上之物扼輶也月題今所謂額鏡
也介倪介獨也獨立而睥睨怒之狀也闔扼曲頸而
扼拒也不受銜絡之意驚猛也曼突也不受羈勒而
相抵突之狀詭設計也竊潛地也詭計以入銜潛竊
以加轡皆是悍驚不受調服故銜轡之時如此費計
較也與人抗敵者曰盜馬之知至於抗敵人伯樂使

之也若無衡扼銜轡之事則馬自馬人自人豈見其
介倪闥扼之態哉民能已此者言民之所為止於如
此也匡正也以禮樂而正人之形以仁義而慰人之
心皆聖人作而後有此上古本無之縣跂高揭而提
起之意蹉跎不自安也好知爭利比馬之詭銜竊轡
也內篇外篇正與左傳國語相似皆出一手做了左
傳又成國語其文却與左傳不同如莊子此篇便是
箇長枝大葉處故或者以為非莊子所作却不然



欽定四庫全書

莊子口義

六

莊子口義卷三